

Ka pahū mai tētahi, ka kī ake a Hōri, “Nāku tērā.”

Nā, e pērā ana, e pērā ana te āhua o ā rāua mea, ka pahū mai tētahi, ka pahū mai tētahi, ā, “Nāku tērā.”

“Nāku tērā.”

Nāwai rā, nāwai rā, kātahi ka patero ake ko te Hōri nei. Kua kī ake ko te Tame rā “E, nāku tērā.”

Nā, mā koutou tonu e titiro ake i roto i te kōrero paki. He momo whakatoi, engari, he momo whakangahau. Ki te titiro ake i te ngākau o te tangata, ki te wairua o te tangata, ki te tere hao o tētahi i te pahūtanga mai o te kānga, kua karanga ake ia “nāku tērā” kia kore ai e riro i te hoa. He momo tohutohu anō tēnei mō tēnei mea, mō te matapiko, mō te hao, engari, he ngahau anō kei roto i te kōrero rā, ā, me te aha, kua kite tonu atu koutou ka rongo koutou i runga i te paterotanga mai a tētahi ka pōhēhē, tētahi, ā, i pahū mai ko te kānga tere tonu tana kī “nāku tērā” engari, arā e whakamārama ake nei au he momo tohutohu anō mō ngā tāngata āhua matapiko, hao rānei ki tēnei mea, ki te kai.

Tērā, tērā kōrero. Tērā anō tētahi o ngā kōrero e pā ana ki ngā momo tirohanga a te Māori i roto i tōna ao, tana tirohanga ki ngā kararehe. Nā, he wā e matemate ai te tame ki te uha. Ko te tame ko te mea tāne, ko te uha ko te mea wahine o ngā kararehe o roto i te ao. Tērā, ka tangi te pūru kau. Ko te tangi a te pūru kau i a ia ka matemate atu ki te uha kau, “Ūha! Ūha!”

Nā, mehemea iana ko te peihana, nā, kua tangi ko te tame peihana, “Te teke! Te teke!”

Tērā, kua haere ki te manu nei, ki te koera. Nā, ko ētahi o ngā momo koera pēnei ai te tangi a te tame koera ki te uha, a te tangi rānei o te uha ki te tame, “Tō tou! Tō tou!”

Nā, ka tae ki te kararehe nei, ki te poraka, ngā poraka e noho nei i roto i ngā repo. I reira kua rongo koe i te poraka e kī ana, “Eke, eke! Eke, eke! Eke, eke!”

Me waiho ake au i ērā tangi nā te mea arā atu anō tētahi momo tangi e pēnei ana nā, mō te kawau. Ko te kawau he pēnei tāna tangi, “Ko au! Ko au! Ko au!” Mā koutou e whakarongo ake ngā tangi nei. Ahakoa

ko te takahuritanga o ngā kupu e te kaikōrero i te paki, kua takahuritia kia uru atu he wāhanga ngahau. E mōhio ana koutou e kore e taea e koutou te kōrero ēnei kōrero i te huhua o ngā wā, engari, he wāhi anō e kōrerotia ai e koe, he rōpū anō e kōrerotia ai e koe. Ka taea i roto i te huihuinga Māori te kōrero ēnei kōrero. Koirā te wāhanga tuatahi hei whakaaro ake mā koutou.

Ko te wāhanga tuarua hei whakaaro ake mā koutou ko te rongo tonu o te taringa Māori ki ngā tangi nei, ka whakamahia e ia i roto i ana kupu kia rite ki te tangi a te kararehe rā, engari, i te putanga mai he kupu Māori kē, ā, me tōna tikanga hoki. Koirā te mea tuarua hei whakarongo ake mā koutou, hei whakaaro ake mā koutou.

Ko te mea tuatoru ko te titiro tonu ki te āhua o te noho tahi a te tāne me te uha, a te tame rānei me te uha.

Ko te tuawhā o ngā āhuetanga o roto o tēnei kōrero, o te kōrero paki, ko te whakatakoto huarahi atu mā ētahi hei whāinga mai mā rātau i ā rātau ake kōrero paki hoki, i runga pea i te wairua o ērā kōrero, i runga kē rānei i tētahi atu huarahi. Nā reira, ko te mahi kōrero paki nei i roto i te huihuinga tāngata, kāre e kore ka kite koe e puta mai ana ngā pūmanawa o ngā tāngata ki te kōrero i ēnei momo kōrero. Ka roa atu, ka hohonu atu, ka whānui atu ngā kōrero. Hei ētahi tāima ka paruparu kē atu pea ki roto i te kupu Pākehā i te kupu Māori. I te wā o te whaikōrero me tapu ngā kōrero. Kua makere mai te āhua o te tapu o te huihuinga i muri i te whaikōrero, kātahi anō koe ka āhei ki te tānoanoa ki ēnei kōrero. Nā reira, koinei au i whakatūpato ai ki ngā wā e kōrerotia ai ēnei kōrero, ki ngā wā hoki e kore ai e kōrerotia. Engari, mā koutou anō hoki e whakarongo ake te āhua o ngā kupu kei roto i ngā kōrero paki nei. Mā koutou e titiro ake te momo reo e whakamahia ana kia aronui atu ai te taringa o te kaiwhakarongo ki aua kōrero rā.

Ko tētahi wāhi nui hoki o roto i te kōrero paki ko te kanohi o te tangata kaikōrero, ko te kori o tana tinana, ko te kori o tana kanohi, ā, ko te whakarekareka āna ki ana kōrero, ko te whakawai āna i te hinengaro o te kaiwhakarongo mai i ngā kōrero. Tēnā koutou.